

四庫全書

集部

欽定四庫全書

西坡類稿卷三十二

吏部尚書宋犖撰

奏疏一

歲戊辰犖以謫劣蒙

聖天子格外簡拔填撫江右越四年壬申移節吳門又

十四年乙酉蒙

聖恩擢長銓曹如蚊負山夙夜悚惕今幸得乞身而歸

矣伏念先莊敏文康兩公並厯官巡撫以至大用政績載在家乘大要以敦本守拙為準肇今日者不敢負家訓即不敢負

國恩新城王司寇士禎曾謂肇曰公豫章定變淮揚賑饑二事堪於史冊大書特書肇愧不克承暇日檢閱二撫題奏擇其事之大者存之得如千篇江左請蠲請賑數逾七百萬補牘太繁難於悉存凡銀米自二千兩石以下者不錄二年吏部疏俱會題無專稿故

亦不錄惟以乞休與謝

恩疏附焉庶稍具敦本守拙之槩歸老西陂倘二三親舊以宦況詢者當出示之匪敢以司寇語為誇也康熙

熙戊子初秋日華序

江西巡撫到任疏

康熙二十七年
六月十九日上

竊臣仰荷

皇上特恩簡任江西巡撫奉

命之後臣即遵照定例將任內一切錢糧與署江蘇布政

司事分巡淮揚道副使臣胡國佐交代清楚於康熙二十七年五月十九日由水路赴任至六月十三日入江西九江府彭澤縣境時因楚省兵叛界連九江印信未便遠齋至六月十七日舟抵南昌府新建縣昌邑地方始接護理巡撫印務署布政司事督糧道叅政臣吳延貴差委南昌府通判陳璫臣標左營遊擊中軍詹英齋捧欽頒江西巡撫關防一顆

王命旗牌八面副并書吏文卷到臣謹驗收遂於本

月十九日到省城臣署恭設香案望

闕叩頭聞用受事訖所有

勅書開載事宜以及地方應行應革利弊容臣祇遵次第舉行其勦禦楚省叛兵事宜見在另疏具題外合將入境到任日期繕疏恭報伏乞

皇上睿鑒勅部查照施行

謝

恩疏二十七年六月十九日上

竊臣一介庸流以父權官國史院大學士叨承

恩廕由外吏厯任刑曹迨奉

簡書分巡通永惟知恪共厥職原無寸長可表蒙
皇上不以臣為菲才超逮山東按察使已出非常知遇
甫任半年不由會推又蒙

特恩擢授江蘇布政使受事僅止數月又蒙

皇上陞補江西巡撫一歲之間三叨

特簡游膺節鉞

聖恩高厚亘古希逢臣何人斯邀此曠典即使捐糜頂
踵難以報稱萬一惟有益勵素心勉竭愚悃潔己率屬務
期大法而小廉簡政平刑庶幾民安而物阜以仰報我
皇上格外簡拔之殊恩而已臣謹望

闕叩頭恭疏奏謝伏乞

皇上睿鑒施行

撥協楚餉疏二十七年六月十九日上

竊臣欽膺

簡命巡撫江西所有入境到任日期已經另疏題報在案惟是湖廣督標裁兵肆叛臣舟抵江南大通鎮地方接准署兩江總督安徽撫臣楊素蘊咨會到臣以江楚接壤封疆重務亟需調度晝夜兼程前進於六月初十日至安慶府會署總督臣楊素蘊知已調撥江右撫鎮兩標官兵前赴九江勦禦臣又與面商機宜至十三日舟抵彭澤縣據九江營副將王昶標下右營遊擊陳化龍會詳呈請給發赴楚官兵行月糧餉臣思師行糧

從難以稍緩路過湖口隨諭令湖口縣動支本年地丁
銀一千兩併委分巡饒九南道僉事臣朱尚隆領齎前
銀星赴潯陽如各標營官兵有應給行糧者即行支給
如月餉未支足者俱一一發足使官兵星馳前進會兵
合勦又准署督臣楊素蘊咨據湖廣黃州協副將阮述
報稱卑職調領官兵作何籌畫糧餉接濟移臣檄行布
政司發銀四百兩差役齎給以應該將官兵糧餉之需
臣亦經檄行江西布政司照數差齎交付該將查收外

至於進剿事宜容臣相機調度另疏具題所有動支錢

糧給發本省官兵行月糧餉并借給楚省餉銀臣謹會

同署理江南江西總督印務安徽撫臣楊素蘊合詞密

疏題報伏乞

皇上睿鑒施行

支給行糧疏二十七年六月
二十九日上

據江西布政司布政使王業興詳稱奉署理總督江南江西事務安徽楊巡撫票開照得楚省裁兵偶爾猖獗

本督院現在調發潯協省鎮官兵前往撲勦然師行必須糧從所有應用行月糧餉合行查照往例給發備票行司即將潯協省鎮出師官兵應需行月餉米會同糧道查照往例就近給發以足兵食等因奉此該本司查得從前出師官兵例於俸餉月米之外支給行糧廩給鹽菜銀兩以及粳粟二米查俸餉月米二項現有奉部撥給錢糧米石可以按款支給無庸置議外今查潯協省鎮官兵調征楚省奉督院檄行所有應用行月糧餉

合行查照例給發但兵馬錢糧各有項款雖師行糧
從勢所必需而該協鎮出師官兵應需廩給鹽菜與夫
粳粟二米現今無有項款可以查給已於本年六月十
八日詳請督部院懇將潯協省鎮出師官兵應支廩鹽
銀兩以及粳粟二米並賜題請聽部撥給何項錢糧至
日以便遵照支放其支給銀米似應於到楚之日方可
開支但應否就近於楚省支給抑或仍於江省支領報
銷併請賜咨內部核奪示覆等因在案今奉前因合就

詳明本院俯賜一并題請聽候內部示覆遵行呈詳到
臣據此該臣看得楚省督標裁兵叛變黃蘄失陷前經
署理總督印務安徽撫臣楊素蘊檄令九江營副將王
昶遣發官兵赴援隨經該將會同臣標遊擊陳化龍委
令右營守備汪應超統領撫鎮九江等標營官兵先後
共五百五十餘員名前赴蘄州進剿惟是師行糧從前
臣舟抵江境據該將等會詳請給行糧月餉當經諭令
湖口縣動支本年地丁銀一千兩委令分巡饒九南道

僉事朱尚隆齋領赴潯以應急需經臣會疏題報在案

今據布政使王業興詳稱出師官兵例於俸餉月米之

外支給行糧廩給鹽菜銀兩以及粳粟二米查俸餉月

米奉有部撥可以接款支給行糧銀米無有項款并應

否於到楚之日開支就近於楚省支領抑或仍於江省

支給報銷詳請具題前來臣查楚省黃州等處為賊竊

踞未經恢復前黃州副將阮述尚請借支糧餉則楚省

無項可給自應仍在江省支給報銷相應題請勅部議

撥何項錢糧以便遵照動支俾赴楚官兵得資飽騰而
勦禦均有賴矣臣謹會同署理江南江西總督事務河
臣王新命合詞密疏具題伏乞

皇上睿鑒勅部議覆施行

擒誅叛逆疏二十七年正月初一日上

竊臣荷

皇上特簡巡撫江西於江南途次聞楚省兵諱告警輿
江省接壤亟需防禦臣念切封疆星夜兼程前進於六

月十九日抵署受事業經題報在案一切防勦機宜無不悉心籌畫次第舉行當據鄰楚各府州縣紛紛具詳稱境內裁兵實繁有徒恐乘間煽亂請兵防禦遂嚴飭各屬加意防範臣仍不時稽察於六月二十九日午時據臣標中軍遊擊詹英引領旗牌羅魁密稟有乾子伍紹係宜黃人來省看親有店家呂瑞伯向言聞有督標裁兵勾連匪類謀為不軌事關叛逆相應密稟又淮南昌鎮臣陳平差功加守備許祿稟同前情隨密拘店家

呂瑞伯到臣親審據供小的係開歇店的人聞得裁兵
李美玉袁大相二人為首勾連幾千人目下就要作反
故此小的對伍紹說知詰你為何知道李美玉袁大相
謀叛想你也是同謀的人了供小的若是同謀的怎肯
對伍紹說詰你為何自己不出首呢供小的是小民不
敢到老爺衙門出首小的曉得伍紹的乾老子是老爺
衙門旗牌故此對他說叫他來稟報老爺等語臣隨差
原任南昌鎮標丁憂候補遊擊趙永吉親身密捕於本

日申時據擒獲李美玉袁大相二人到臣當發在省司道會審據按察使詳稱蒙發叛犯李美玉袁大相到司隨會同司道在公所會審問李美玉袁大相你們是甚麼人敢謀為不軌供小的二人原是督標裁汰的兵並沒有謀為不軌的事詰現有出首的呂瑞伯在此你還敢假說麼隨傳呂瑞伯面質又據李美玉袁大相合供小的們實說了罷原是小的二人起的意聞得湖廣裁兵為亂小的就要舉事破了江西好去湖廣合夥故此

勾連原日裁兵有三千多人有八百有器械的有幾千沒有器械并遊手好閒的有一二千打算七月初間逢各官上衙門的日子先拏了這些官然後劫倉庫好往湖廣去不想被人出首詰你把同謀作叛做頭目的姓名速供來供這事原是小的二人起的念頭就是小的二人號召各處裁兵彼此連結的各處的人尚沒聚齊還沒有定頭目詰你二人謀算怎麼樣聚齊這些人呢供各人散一箇帖子底下一箇西字為號上面紙空了

他自己填名字又各穿白衣為號放砲聚齊是實又詰
李美玉袁大相這呂瑞伯可是你們同夥的麼供呂瑞
伯並不是同夥的各供吐在案當在李美玉袁大相身
邊搜出西字帖子二張附卷據此該本司按察使孫蘭
會同布政使王業興督糧道叅政吳延貴護理驛鹽道
印務南昌府知府張士佺督學道僉事邵延齡都使司
俞承都會審看得楚省裁兵作亂自本院莅任之日即
奉嚴飭省會外郡稽察奸宄固守封疆以消異萌不意

有原督標裁兵李美玉袁大相乘機謀叛輒敢勾結各處裁兵以暨匪類約計數千意欲於七月初旬放砲聚集暗散酉字紙帖白衣為號以各官上衙門之日舉行不軌幸本院旗牌羅魁聞風於店戶呂瑞伯出首而逆謀敗露奉委丁憂候補趙遊擊手擒李袁二犯發司會審之下不待刑訊直吐真情惟是楚省叛變人心風鶴而江省奸宄思欲效尤倡亂法實難逭相應詳解本院親審先行正法以正人心俯賜題報施行等因詳解到

臣經臣會同南昌鎮臣陳平傳集各司道覆加研審各犯供吐與前無異該臣看得叛犯李美玉袁大相係原督標之裁兵也乘湖廣叛變暗勾匪類謀為不軌經臣旗牌羅魁乾子伍紹聞店戶呂瑞伯之言首報臣標中軍遊擊詹英引領密報又准鎮臣陳平差功加守備許祿密稟臣思擒捕叛犯非謀略出衆者恐致洩露免脫釀成大患查原任南昌鎮標丁憂候補遊擊趙永吉智勇兼全遂差密拏李美玉袁大相到臣即發司道會審

詳解前來臣覆加親審據供勾連羽黨約共三十多人佈散西字紙帖身穿白衣為號意圖本年七月初間捉拏各官搶劫倉庫赴湖廣合夥歷審供吐情真誠堪髮指至所稱黨羽未經指實應免深求但江省界連楚地人心風鶴若不亟正典刑無以震懾奸黨之心且恐日久變生為害匪輕臣於會訊之後謹請

王命將李美玉袁大相押赴市曹正法以慰人心以安反側事關裁兵謀叛幸藉

皇上洪福敗露消弭合應題報至七月初一日乃停刑之期例不應處決但關係閩省安危不便緩待合并聲明臣謹會同南昌鎮臣陳平合詞密疏具題伏乞

皇上審鑒施行

發兵防守疏

二十七年七月六日上

該臣看得江省界連楚境在在需兵防守然切近最緊要者無如南昌所屬之寧州銅鼓界聯湖廣平江崇陽等處武寧界聯湖廣興國等處靖安界聯寧州茅竹山

地方查寧州銅鼓營止有額兵二百名武寧營止有額
兵一百八十名靖安縣原係南昌鎮標撥防兵丁九十
五名前因楚省兵叛經南昌鎮臣陳平撥發千總一員
把總一員帶兵一百五十名前往寧州貼防又撥千總
一員帶兵一百名前往武寧貼防又撥百總一員帶兵
二十名前往靖安貼防在案臣接准部咨尤恐各處兵
力單薄復面商省鎮臣陳平將抽調撫建廣各營之兵
再行添撥以防逆賊敗遁查拏勦滅當准鎮臣陳平咨

開檄令建昌營千總洪玉帶兵一百名添防寧州令前
撥千總黃善把總劉高帶兵一百五十名同銅鼓營把
總王國柱帶兵前往銅鼓之礮頭崇鄉各隘分防檄令
撫州營把總洪章帶兵五十名添防銅鼓城池檄行廣
信營把總文玉帶兵一百名添防武寧縣同前撥千總
廖瑞廣帶兵一百名於楚界牛屎嶺地方駐劄等因前
來是寧州武寧鄰楚地方雖疊次添兵防禦尚屬兵單
但江省處處環山需兵防守又不便多為調撥以滋內

患至袁州府雖與湖南連界而萬載縣密邇瀏陽山僻
小徑直達湖北該屬亦係緊要屢據該府縣疊詳請兵
防守堵勦臣思各處實無兵可調不得已將前題調南
贛各標營官兵之內撥發三百名前往袁屬協防以資
勦禦所有江省界連楚省地方前後撥兵防守情由臣
謹會同署理江南江西總督事務總督河臣王新命南
昌鎮臣陳平合詞密疏題報伏乞

皇上睿鑒施行

預備軍需疏

二十七年七月初六日上

據江西布政司布政使王業興詳稱奉巡撫江西右副都御史宋牌開康熙二十七年六月二十日准兵部咨開康熙二十七年六月初六日大學士伊桑阿尚書阿蘭泰紀爾塔布侍郎禪布覺羅舜拜奉

上諭楚省督標裁兵在武昌作亂雖無妨於事應速發就近地方兵丁勦除著都統瓦岱馳驛速赴江南調取江南京口滿洲漢軍綠旗兵丁船隻水陸並進速行勦

滅總河王新命著馳驛速赴江寧署理江南江西兩省
事務令各防守地方左都御史馬齊著署理總河事務
今湖北巡撫不知下落將湖南巡撫丁恩孔授為湖北
巡撫著馳驛速赴荊州料理錢糧事務防守地方其湖
北巡撫印信速行鑄造送去至襄陽南陽俱係要地總
兵官蔡元曾在行間多有勞績且原在襄陽日久著馳
驛速赴襄陽管轄兵丁看守地方著兵部司官一員速
往登州看蔡元起程蔡元前去之時照依所帶之人多

給驛馬太原滿洲官兵應酌撥速發南陽駐防如再另有可議之處著議政王貝勒大臣會同一併議奏欽此該議政王等會題前事康熙二十七年六月初六日題本日奉

旨巴渾德補授荊州將軍尚未到任不能認識官兵停其前往荊州著同瓦岱前往會商而行副都統希福著用荊州將軍印同阿濟里帶領荊州兵丁與提督徐治都之兵前往武昌勦撫將軍噶爾漢著鎮守荊州瓦岱

等速赴江寧到日將軍博濟同副都統烏黑帶兵進勦
副都統穆成格著鎮守江寧京口官兵船隻速行前往
江寧等候瓦岱等瓦岱著給振武將軍印勅書後寫趕
送瓦岱等至江寧將督標火器營兵丁酌量揀選數百
帶去餘依議欽此為此合咨前去欽遵查照施行計黏
單一紙等因到院准此備牌到司奉此并奉黏單內開
該臣等會議得湖廣督標所裁兵丁在武昌作亂大干
法紀應速遣發將軍兵丁勦除不致滋蔓調發江南京

口滿洲漢軍綠旗兵丁船隻進剿等處

上諭周詳應令都統瓦岱馳驛速赴江南挑選江寧副都統烏黑穆成格八旗兵丁二千名前鋒兵丁二百名京口副都統張思恭漢軍兵丁一千名水師總兵官陳奇綠旗兵丁一千名由水路所去兵丁約帶戰船水陸兩路急行前去作速勦滅其瓦岱統領全師剿殺賊寇應給將軍印信給何將軍印信之處伏候

上奪荊州將軍巴渾德亦令馳驛速赴荊州與副都統

阿濟里將荊州兵丁帶領一半進剿武昌會同將軍瓦岱之兵兩路夾攻勦除至湖廣提督徐治都將常德等處固守酌量遣發官兵會同將軍侯巴渾德等合力勦滅令噶爾漢希福看守荊州等處俟滅賊之日將伊等退回之處嚴加查議行文江西河南等省撫提等各行防守邊境地方如叛賊被大兵勦殺急迫有敗遁者查拏勦滅總督王新命左都御史馬齊巡撫丁思孔總兵官蔡元等遵奉

上諭速赴各指之處太原城守尉覺羅喇喀帶領三百
兵丁速赴河南南陽駐防至武昌出來遊擊馬駿聲知
縣馬雲會等既稱願隨大兵行走應令其隨大兵行走
荊州兵餉行文河南布政使田啓光將河南省現貯庫
錢糧內動支十萬兩以文到揀運官兵作速固解交送
湖廣巡撫丁思孔江寧京口兵餉行文安徽巡撫將現貯
庫錢糧內動支十萬兩支給其太原兵丁駐防河南南
陽府應行文河南布政使田啓光將河南省現貯庫

錢糧內動支一萬兩支給可也等因奉此又奉本院牌行一件軍務事內開案據九江府呈詳楚省叛變滿漢大兵至日必湏用槽鑄鍋桶以及上水縛夫裝運船隻并應支糧料作何預備緣由已經批行該司會同驛鹽道作速查議詳奪去後今准兵部咨開奉

上諭撥發江南京口滿漢官兵進剿路由九江經過需用糧料等項刻難遲緩合亟飛催仰司即將江南京口滿漢官兵經過九江進剿需用糧料縛夫等項該司星

速會同驛鹽道預先計議妥確即刻詳報以憑批奪事
關軍機毋得遲誤火速火速各等因到司奉此除夫船
應俟驛道查議另詳批奪外該本司查得大兵進剿需
用糧料以及槽斬鍋桶各項例應動支錢糧備辦以供
急需其採買供應各數俟於報銷軍需案內造冊同取
具清字檔領送部核銷此歷來應付軍供之定例也今

楚省督標裁兵叛變奉

上諭撥發滿漢大兵進剿路經潯陽所需米糧料草槽

鑊鍋桶等項當預備應付自應照例行令九江府於該屬本年地丁新裁銀內動支備辦俟大兵一至即行供應第該屬二十七年錢糧值此青黃不接之候誠恐供應不敷有誤急需相應詳請於附近之饒州南康二府屬各動支二十七年地丁銀一千兩協濟速行委官解赴九江府交收一同備應并取具清字檔領造冊詳報核銷但事關動支本年正項錢糧備應緊急軍需合就詳請本院俯賜會疏題報以便日後彙冊報部核銷施

行等因呈詳到臣據此除需用夫船前據驛鹽道詳議

已經咨明兵部外該臣看得楚省裁兵叛變奉發大兵

進剿經過地方一切糧料槽鑊鍋桶等項為軍供之所

必需前據九江府詳請應動何項錢糧買備應付臣隨

批令布政司會同確議去後今據布政使王業興詳稱

大兵進剿所需米糧料草槽鑊鍋桶等項例動錢糧備

辦今勦楚大兵路經潯陽自應行令九江府於該屬本

年地丁新裁銀內動支備辦但值茲青黃不接之候誠

恐供應不敷有誤急需相應於附近之饒州南康二府屬各動支二十七年地丁銀一千兩協濟速行委官解赴九江府交收一同備應取具檔領以便日後彙冊報部核銷等因前來臣以軍供關係緊要未敢緩視除行

藩司將饒州南康二府屬康熙二十七年地丁錢糧銀內各動一千兩解赴九江府協濟預備應付外所有動撥饒州南康二府地丁銀兩數目協濟應付緣由相應題報臣謹會同署理江南江西總督事務總督河臣王

新命合詞具題伏乞

皇上睿鑒勅部議覆施行

題補遊擊疏

二十七年七月六日上

該臣看得中軍一官有綜核錢糧訓練兵馬之責必得才幹優長曉暢軍機之員始克勝任況值鄰封告警在戒嚴尤需能員料理今准南昌鎮臣陳平咨中軍遊擊徐國佐累月卧病職守曠廢查有原任鎮標丁憂候補遊擊趙永吉歷練營伍才技優長雖經丁憂查新例

已奉部行叅將以下仍留在任守制以之委補實為駕

輕就熟等因前來

臣

查江省密邇楚境茲當叛兵告警

操練兵馬分守防禦稽察奸宄需員孔亟今鎮標中軍

遊擊徐國佐患病已久不能料理業經鎮臣陳平咨報

署兩江總督事務河臣王新命題報所遺員缺自應聽

候部銓但今鄰封多事中軍為閩鎮綱領刻難乏員今

准鎮臣陳平咨移臣念封疆事大已暫委候補遊擊趙

永吉署理調度兵馬晝夜親身巡防除咨達督臣外相

應具疏保題仰請

皇上勅部將趙永吉補授南昌鎮標中軍遊擊員缺使
該將得以殫心營務保固疆圉所全甚大江右雖非邊
疆無保題之例但今正值用兵臣從封疆起見冒昧題
請合併聲明臣謹會同署理江南江西總督事務總督
河臣王新命南昌鎮臣陳平合詞密疏具題伏乞

皇上睿鑒勅部議覆補授施行

條議賈稅疏二十七年十一月二十日上

該臣看得贛州府全書額編賈稅入門稅橋稅三項未
設部司以前俱係通判經收分解橋稅銀兩在於過橋
商貨內抽收其賈稅銀一百八十四兩一錢九分脚耗
銀五兩一錢五分七釐三毫二絲原與入門銀稅三百
八十二兩五錢三分二毫總在進城客貨內每兩抽銀
二分以之分款起解是賈稅與入門稅起解雖各有款
目而徵收實屬一項也迨後奉

旨專差部司監督

勅書開載止有橋稅門稅二項未將賈稅開入所以向來監督部司止按橋稅門稅之額報解考核遂致賈稅一項懸款無著在知府考成攸關不無賠墊之苦乃於康熙十四年前任革職已故知府萬文麟朦混創議將郡城內外一切貨物凡贛關徵收入門稅一兩者另徵賈稅二錢詳定抽收從此一門兩稅一貨兩徵之弊起以致商人貨物既赴贛關報納門稅又必守候該府盤驗重納賈稅不但官得藉以橫徵而委收胥役復得借

查貨而勒索種種害商流弊至今臣蒞任以來誠恐民
隱難周聞見未悉首以地方利弊徧行諮詢據分巡贛
南道僉事鍾有德將此賈稅一項實屬商民受困情由
詳請具題歸併監督部司徵解臣隨批令布政司查議
去後今據署布政司事陞任督糧道叅政吳延貴詳稱
此項賈稅從前實與入門稅銀並徵分解門稅既已歸
併關徵則賈稅亦應歸併在當日改歸關徵之初內部
止知有橋稅門稅之名而未悉賈稅在內以致

勅書未載今一稅兩徵實為累商大弊詳請具題改併
贛關悉聽部司徵解報部考核除去知府考成等因併
又移准監督贛關稅務臣盛符升移覆賈稅既係原於
門稅每兩抽銀二分內分款起解應從所議以恤商民
等因前來臣查門稅賈稅俱屬

朝廷錢糧如歸併關徵而有虧
國課臣何敢冒瀆

宸聰惟是一經歸併於

國課分毫無損而商民十餘年之積困可以頓蘇臣又
何敢因循緘默伏讀康熙二十六年五月初三日

恩詔內開凡直省地方有見行事例不便於民者許各
該督撫詳察開列具題該部酌量更正等因欽遵在案
茲贛州府賈稅重徵一項實屬不便於民伏乞

皇上俯賜睿鑒將此賈稅歸併贛關

勅部載入

勅書一併徵解每年悉聽部司報部考核除去知府考

成永遠遵守則商民獲免一貨兩徵之重困咸戴
皇仁於無疆矣相應具題聽候部議臣謹會同江南江
西督臣傅臘塔合詞具題伏乞

皇上睿鑒勅部議覆施行

條議採買竹木疏

二十七年十一月二十日上

該臣看得江右地瘠民貧自經兵燹之後閭閻彫敝已
極臣荷

皇上特簡叨膺巡撫重任亟思興利除弊以期民安物

阜今據署布政司事陞任督糧道叅政吳延貴詳稱江
省每年奉文採買紫竹一百一十六根楠竹四千五百
根楠檀木六十根內惟康熙二十三年初次採買楠檀
木已奉部文撥給價值其餘節年採買竹木向來以部
文未有准動錢糧之語俱係分派各屬捐解如紫竹則
取給於饒州府屬貓竹則通派於閩省州縣楠檀木則
係南康九江二府輪流捐解名雖官捐其實累民議動
正項採買委員運解請題前來臣細繹原奉部文雖未

開有撥給錢糧字樣而於初次採買楠檀木部文之內
已有價值行令地方官撥給毋得濫派小民等語開載
甚明且既曰採買自應給與價值即無撥給錢糧字樣
承辦各官自應具文請明部示准給價值方不擾民何
得輒以捐解為名致貽民間歷年重困此皆以前各官
奉行不善之咎也伏讀康熙二十六年五月初三日

恩詔內開一直省地方有見行事例不便於民者各該
督撫詳察開列具題該部確議酌量更正等因欽遵在

案江右採買竹木一項名雖各官捐解實屬累民事之
最不便於民者臣亦何敢緘默伏乞

皇上睿鑒勅部嗣後採買竹木准令動支正項錢糧解
運報銷併請

天語嚴飭經收人員毋得借端揩勒吹求則全省之民
得免重累咸沐

皇仁於萬世矣臣謹會同江南江西督臣傅臘塔合詞
具題伏乞

皇上睿鑒勅部議覆施行

請給解犯口糧疏

二十七年十二月初二日上

該臣看得江省在監罪犯久沐

皇恩設立囚糧於常平倉內支給獲免疾斃甚盛典也
惟各省遞解人犯向未給有口糧長途饑餓在所難免
復蒙

聖慈矜惻於康熙二十六年五月初三日恭奉

恩詔內開凡解部及遞解外省各項犯人沿途口食不

敷困於饑餓者可憫應按程給與口糧勿致餓斃其有
解役將犯人恣意凌虐揜勒拷打及教唆人犯沿途搶
奪擾害良民者應作何治罪該部嚴議定例具奏欽此
隨經刑部等衙門會議題覆奉

旨依議欽遵通行在案江右路當孔道解部及遞解各
項人犯絡繹不絕自應欽遵

詔旨按程給與口糧因未奉有部文應動何項糧米支
給沿途各地方官尚未舉行事關動用錢糧例應具疏

題請伏乞

皇上勅部查議或照囚糧之例亦在常平倉內支給統於年終報銷計日按程或照律例日行五十里為一程每犯一名日給米一升道里遠者逐程加給其有阻風患病者該地方官察驗明確按日加給嚴禁不許託故逗遛違者將解役治罪仍令各該督撫二臣於起解人犯咨牌內開明每名日支口糧俾經過各地方官遵照按程支給抄牌報銷庶動用有額設之款項支給有一

定之數目而解犯得霑實惠可免饑寒沿途亦不致有擾害良民之患矣茲據按察使吳延貴具詳前來臣謹會同江南江西督臣傅臘塔合詞具題伏乞

皇上睿鑒勅部議覆施行

請緩徵兵糧疏

二十八年正月
二十九日上

該臣看得額徵本色兵米向與兵餉錢糧一例四月完半九月全完有司恐悞考成按期徵比不敢稍緩四月應完一半之米江省地瘠民貧蓋藏絕少四月種苗之

際何能有米輸將小民迫於追呼勢必稱貸以應不特入城候比貽悞農務且恐加利揭債重費民財臣幾經籌思必得變通之法始可紓民力而重農功茲據督糧道叅政鮑復昌詳稱江省綠旗馬步戰守兵丁共一萬五千名額支本色兵米五萬四千石以本年十三箇月計之應支兵米五萬八千五百石查各州縣併省倉共現貯米八萬九百八十五石七斗九升零儘支一年兵米尚有留餘請將康熙二十八年分本色兵米四月完

半之例寬至九月一併徵完以備下年支放前來臣查
節年存倉兵米原奉部文放舊存新係先應支放之米
除儘支本年兵米之外尚存剩米二萬二十四百八十
五石七斗九升零則於康熙二十八年四月完半之例
自可寬至九月秋成之時一併徵完留備下年支放將
來俱可寬至九月全徵兵米既已裕如小民又易輸納
且查各項錢糧考成定例歲內全完者概得議叙既遵
放舊存新之部文又不致違歲內全完議叙之定例一

轉移間東作之時小民永免追呼之擾得以盡力南畝
而倉米不致久貯亦無浥爛耗折之虞兵丁得以常支
新米用資飽騰矣我

皇上軫念民瘼首重農事臣敢冒昧上陳仰祈

俞允永著為例江省之民咸沐

聖澤於萬世矣臣謹會同江南江西督臣傳臘塔合詞
具題伏乞

皇上睿鑒勅部議覆施行

特糾貪恣監司疏

二十八年三月初一日上

竊惟綏安兆姓首在除貪懲創劣員尤嚴大吏以其為各屬之表率也臣蒙

皇上特簡隆恩叨膺巡撫重任惟有潔己率屬釐弊除貪凡江右向來一切積弊盡已革除至若徵解漕糧尤為弊藪於去年徵漕之日即將陋弊嚴檄禁革臣自受事以來已將貪汚守令先後糾叅至於監司一官尤應守法持廉俾屬員知所則倣每與同城司道諄切告誡

共相砥礪務期弊絕風清民生暢遂以仰副我

皇上愛養元元至意乃督糧道叅政鮑復昌於去年十

一月內到任見臣盡革諸弊未遂貪心多方苛求各屬

竟思更變成法抗禁妄行臣屢次面加詰責復又嚴檄

申飭令其自勵廉隅孰意復昌弁髦法紀姿肆貪婪仍

向屬員勒索陋規臣正在密訪糾叅間據新建縣知縣

李郁詳為據實首明以遵

功令以盡職守事竊照漕糧一項上開

國課下悉民膏卑職自莅任以來仰遵

功令照額徵收不敢顆粒稍盈以自干罪戾久在洞鑒
之中康熙二十七年分漕糧徵收解給遵限無悞本年
二月二十一日鮑糧道突傳面諭指稱漕費勒索銀一
百二十兩卑職微員下吏慘受威制不得已而竭力措
辦著家人李文轉付號吏熊三燦繳進因念當此
功令森嚴無弊不革之候若不及時舉首必致後辦莫
及合行據實首明等情又據南昌縣知縣葉如桂揭為

糧道勒索陋規微員萬難措應不得不據實申報哀願
拯救事切卑職瑣末微員凜畏

功令冰兢自持惟虞隕越凡徵收漕米俱用較準官斛
令里民自行執盪平量交納上倉其分升照由單開載
除給軍三分三升之外不敢絲毫濫收一切陋規盡行
痛革此萬耳萬目所共聞共見者也幸漕務告竣獲免
愆尤不意鮑糧道向南新二縣勒索陋規傳卑職面諭
著交銀二百兩卑職囊橐蕭然萬難措應屢催交送再

四哀憇未蒙寬免致犯糧道之威恐蹈不測之禍值各
院法紀霜嚴事闢迫切情難隱忍不得不申報恩賜主
裁亟施極救則屬員下吏銜結靡涯矣各等情到臣臣
又薦訪得泰和縣知縣張尚善於本年正月內赴省時
復昌勒索漕規銀二百兩係尚善親交有道蠹東房鍾
祥生號吏熊三燦知情可審今據布政司布政使多弘
安按察司按察使吳延貴南昌府知府張士佺吉安府
知府羅京各轉詳具揭前來與臣所訪無異似此貪賊

劣員若不亟行糾叅則各屬閭風效尤甚為民害可勝言哉所當照貪例糾叅請

旨草職與有名蠹役一併提問究擬者也至泰和縣知縣張尚善雖被上司逼勒但行賄不報咎亦難逭合併指參聽候部議臣謹會同江南江西督臣傅臘塔總督漕臣馬世濟合詞具疏題叅伏乞

皇上睿鑒勅部議處施行

西陂類稿卷三十二

欽定四庫全書

西陂類稿卷三十三

吏部尚書宋肇撰

奏疏二

賠造漕船寬限疏

二十八年閏三月二十日上

該臣看得賠造船隻部覆行臣將遲延情由查明題參
臣自准部咨就經檄行督糧道遵照去後今據布政司
布政使帶理督糧道事多弘安詳稱未賠造船二十五

隻內九江衛船五隻廣信所船一十五隻鉛山所船五隻實因康熙十五年大兵進剿排搭浮橋多被損壞與康熙二十二年江西尾幫漕船凍阻宿還河凌擦損奉文責令賠造因各衛所運丁逃絕過多無從僉造今奉查取遲延情由題參行據各軍廳僉稱自甲寅變亂以來軍丁逃絕見存寥寥形同乞丐百法搜僉止報明賠船三隻其餘萬難一時賠補咸請寬緩前來臣思漕船關係緊要自當嚴行提補以資輓運何敢擅議寬期但

江右屯丁素稱疲敝况自甲寅叛亂之後殺戮逃亡十
存二三每遇造運而勞苦掣肘之狀不忍見聞如不速
為軫恤恐將來勢不能支是以檄令各屬一面清查屯
田一面招徠開墾第逃絕過多一時未能頓甦其賠造
各船遲延緣由臣備細確查委係無丁可僉實非各官
敢於怠緩臣身在地方目擊屯丁疲困情形不得不仰
懇

皇上俯念江右屯丁逃亡過半責令一時盡數賠造實

屬萬難

勅部暫行寬期二年容臣嚴督各官多方招集陸續賠

補足數則漕既無悞軍困亦甦至此案遲延之前任叅

劾糧道鮑復昌已經臣題叅在案合併題明臣謹具疏

伏乞

皇上睿鑒勅部議覆施行

請察道府錢糧疏

二十八年四月九日上

該臣看得藩庫爲通省錢糧總匯稽查最宜嚴密今於

每年奏銷之時奉有

俞旨令巡撫親身察盤保題州縣錢糧責成知府查報可謂既嚴且密誠為萬世遵守良法惟是糧驛二道各有經收支放庫貯錢糧既不在於藩庫之內為巡撫察盤所不及而在各府庫內亦有收貯錢糧似應一併清釐庶幾侵那虧空之弊可以永杜於將來宜將糧驛二道庫貯錢糧於每年奏銷之時及二道離任之日責成藩司親身察盤如有虧空立行呈報巡撫題參至各府

庫貯錢糧責成該管各道察盤轉報如無道員管轄之府委令鄰近道員察盤則凡屬庫貯錢糧衙門各有專司稽察之員倘或徇隱照例處分自可永杜侵那虧空之弊矣臣從清釐庫貯錢糧起見謹具疏題請伏乞皇上睿鑒勅部議覆施行

更正全書疏

二十八年四月十六日上

該臣看得新編全書奉

旨發與各巡撫會同經管錢糧司道官員詳察細閱有

無應行更改增刪務期永遠可行明白確議毋得彼此
瞻顧各行具題欽此仰見我

皇上仁愛深遠睿慮周詳惟恐編輯稍有未當不無累

民臣欽遵

特旨隨即檄行布政司會同司道將各經營錢糧務必
按款磨核因革允當如有應行更改增刪之處各抒所
見確查妥議去後今據布政使多弘安按察使吳延貴
帶理督糧道印務布政使多弘安驛鹽道副使張四教

兼攝饒九南道事驛鹽道副使張四教分巡贛南道僉
事鍾有德提學道僉事邵延齡都司俞承都會議詳覆
前來臣查新編全書其中刪繁就簡無不入目瞭然固
已至明且切毋容擬議矣惟起運存留二條項下內有
應歸起運而新書編入存留者又有應歸存留而載入
起運者亦有應行刪除而起運銀內未經減除者如奉
裁各大使俸食與停給歲貢盤纏久已奉文歸入丁地
徵解今新書編入存留又茶芽杠解銀兩已准復給今

新書編入起運至於新增商稅銀兩已奉

恩詔蠲免今仍未刪除此起存項下之應更應刪也若夫起運錢糧內有本折丁地正腳款項其額數各有不同徵解各有先後似應照依增項用小註列明以清款項再查二年一辦之府歲貢酒禮旗匾花紅與州縣歲貢酒禮等銀細閱新書似乎將額銀裁去一半然支給數目未有明示至於三年一辦科舉椅桌銀兩原額三千八百八十兩一錢零從前以三年之銀留為一年支

用迨後奉文裁解每於鄉試之年止准半留銀一千九百四十兩零向來支用不敷悉係各官捐湊臣恐名雖官捐其實不無累民况三年一試大典攸關我

皇上尊道崇儒遠邁古帝即需費浩繁亦屬求賢盛舉今若以半留之銀編為定額將來支用不敷勢必議捐似未可以經久而無弊也臣請以半裁之銀照數全留編給以襄盛舉又進舉牌坊文武舉人水手等款查康熙二十七年准部文內開嗣後每年帶辦銀兩照全書

刊載歸入起運如遇鄉試之年照數動給今新書登入
三年一辦之下似乎鄉試之年止動本年銀兩其二年
所徵之銀應否裁解未有明示似應指出以便遵照又
驛站錢糧內有舖兵一項江西通省原編二千九百九
十九名每名每日工食二分今除裁減外止存舖兵二
千四百六十六名因限於存六之數故於均勻冊內每
名每日僅議編銀一分五釐然舖兵一役奔走傳遞無
分雨夜實為最苦若止給一分五釐則供一人之衣食

尚苦不足何能顧其室家臣請照舊復給工食二分計
每名每日增工食銀五釐歲增銀一兩八錢通計增銀
四千四百三十八兩八錢遇閏加增銀三百六十九兩
九錢於驛站原額之內留給均於各州縣起運銀內開
銷併請於凡例內備晰登列以垂永久至於漕糧一項
尤為天庾重糈查江西有漕各州縣相距會城俱自數
百里以至千里山河小溪輓運艱難動需匝月方得到
次運解有雇船募夫之煩交兌有曠颺贈耗之費故賦

役舊書編載腳耗米同正米副米兵米一體編入畝則
徵收支給以資運解盤剝等項之用今新書將額編腳
耗米內止留贈耗編入起運下支給外餘米悉歸存米
候撥兵糧是各屬既無額款雇募夫船輓運又不能神
輸鬼運欲使漕糧無悞不可得矣臣請於應存米內照
數扣出併入起運另立腳耗一條米數庶各屬輓運有
資不致累民又靖安上高等一十九縣原因民收民兑
不勝煩苦願出津貼官徵官解故於條編正額之外復

有附載耗費米以為雇募夫船等用今各縣附載耗費
米石新書內有照依舊書編徵者如清江新喻新淦廬
陵吉水安福臨川金谿崇仁等九縣是矣有雖編徵又
并入存米之內者如上饒玉山廣永豐弋陽興安贛縣
寧都等七縣是矣再如靖安上高鉛山三縣則又並未
編徵以上各縣內除贛寧二縣漕糧留給虔鎮兵米不
須遠運其耗費米石應遵存撥兵糧外其餘槩請於應
存米內扣出歸入起運與未編者一例編入另立耗費

米數一條以歸漕項支用再查兵米折銀一萬三百六十八兩原係湊抵造船料價之用又餘米折銀五千六百五十九兩六錢四分一釐零因屯糧倉米荒缺過多漕運支用不敷之數即於此內動支此皆漕項急需故舊書刊載在案今新書概入應存米內候撥兵糧則將來濟造濟運不無缺少仍請於應存米內照數扣出另列一條濟造濟運銀米數目以濟漕運又學田項下會昌安遠二縣學租銀一十一兩七錢四分舊書載入存

留聽學道支用至康熙十七年以來已經裁解充餉今
會昌安遠二縣學田租穀新書內既編註學道報銷是
應於裁扣銀內除出歸入存畱而又將租銀仍裁歸起
運則徵解似乎重複嗣後或歸起運或歸存留所當請
明畫一以便遵從再衛所屯糧南昌前袁州贛州三衛
守備員下每員原有額編蔬菜燭炭銀八兩共銀二十一
四兩因康熙二十三年未支故未造入奏冊今新書內
應請添入以符額編至於存留編支世職五員俸銀五

百三十五兩新書係照二十三年冊報之數但見今續有承襲賈鯉一員并原五員內有喬國英等三員續奉文添銀五兩計共六員應支俸銀六百六十兩今新書少編銀一百二十五兩應請添入并請將世職俸銀照舊編入起運項下動支則支給有款報銷亦清至若贛州府賈稅一項尤當亟請更正以垂永遠臣查該府賈稅額載銀一百八十四兩一錢九分脚耗銀五兩一錢五分七釐三毫二絲未設部司以前俱係通判徵收原

與入門稅銀總在進城客貨之內每兩抽銀二分以之
分款起解是賈稅與入門稅起解雖有款目而徵收實
屬一項自奉

旨專差部司監督

勅書開載止有橋稅門稅二項未將賈稅字樣開入所
以向來監督部司止按橋稅門稅之額報解考核遂致
賈稅一項懸款無著至康熙十四年前任革職已故知
府萬文麟朦混創議將郡城內外一切貨物凡贛闢徵

收入門稅一兩者另徵賈稅二錢從此一門兩稅一貨兩徵以致商人既赴贛關報納門稅又必守候該府盤驗重納賈稅臣莅任之初即已諮詢確實具疏題請將此項賈稅改併關徵除去知府考成而部覆以地方官徵收年久故未允從致今新書內仍行編入臣思

國課錢糧必原其賦之所自出然後因地制宜酌古準今垂諸萬世而無弊也若贛州府賈稅從前實與門稅並徵分解今贛關既徵門稅府官復徵賈稅一貨兩徵

欲其不病於商難矣臣身任地方知之最確況蒙
特旨諄切臣又何敢瞻顧不言以蹈溺職之愆仰懇

皇上勅部俯准照臣舊議將此貢稅歸併贛闊徵解載

入

勅書每年悉聽部司報部考核除去知府考成一轉移
間毫無虧於

國課實有裨於商民誠為萬世不易之章程矣其餘核
算數目間有參差及應行更改與請增請刪并應分晰

登註處所因款項繁冗難以殫述除照式抄謄新書黏
簽送部查核外相應具題聽候部議再照此案扣算封
印日期尚未違限合併題明臣謹具題伏乞

皇上睿鑒勅部議覆施行

寧州等州縣衛秋災請蠲疏

二十八年十月
二十六日上

該臣看得江西省寧州新建等四十一州縣康熙二十一
八年秋被旱災情形經臣會疏題報并批該司委令各
府正單騎確勘遵限造冊具結詳報毋得朦混捏報去

後令據布政使王樸詳稱除吉安府屬之萬安撫州府屬之臨川金谿崇仁宜黃樂安東鄉廣信府屬之鉛山弋陽貴溪九江府屬之德化德安瑞昌共一十三縣踏勘俱不成災應行刪除外催據南昌袁州臨江吉安饒州南康六府申報寧州新建豐城進賢武寧奉新靖安宜春分宜萍鄉萬載清江新喻新淦峽江廬陵吉水永豐泰和安福永新餘干樂平安仁萬年星子建昌安義二十八州縣勘實被災六分以上田地塘四千八百七

十二頃六畝一分七釐三毫六絲該免一災銀二千二百八十六兩四錢五分八釐被災七分八分以上田地塘二萬九千五百八十一頃二十七畝二分七釐四絲該免二災銀二萬七千三百五十八兩七錢四分五釐一毫被災九分十分田地塘一十萬五千八百一十五頃五十八畝六分六釐四毫九絲六微該免三災銀一千七萬三千四百八十五兩八分三釐六毫共被災各則田地塘一十四萬二百六十八頃九十二畝一分八

毫零共該免一免二免三旱災銀二十萬三千一百三十兩二錢八分六釐七毫內除隨漕項下錢糧該旱災銀一萬四千一百四十三兩三錢九分一釐三毫遵例不免外實共免災銀一十八萬八千九百八十六兩八錢九分五釐四毫又分宜萍鄉萬載安福星子五縣帶徵袁州南昌左九江三衛并安福所被災九分十分屯田三百五十二頃八十六畝一分四釐零共該免三災銀一千一百一十兩七分五釐六絲內除漕運項下該

旱災銀七百四十六兩五錢一釐四毫零遵例不蠲外
實共免災銀三百六十三兩五錢七分三釐五毫零取
具各被災輕重分數冊結并委勘無虛印結等因前來
臣加覆核無異除將冊結揭送部科查考外臣謹會同
江南江西督臣傳臘塔合詞具題伏乞

皇上睿鑒勅部議覆施行

災田請緩徵疏

二十九年正月十八日上

該臣看得江右地方土瘠民貧室鮮蓋藏年來水旱游

臻仰蒙

皇上矜恤得獲安全茲於康熙二十八年寧州等二十
八州縣秋被旱災本年額賦已沐

皇恩蠲減更蒙

皇上軫念民瘼於蠲賦之外又將被災九分十分田畝
康熙二十九年錢糧緩徵臣跪誦

綸音仰見

聖澤廣被恩波浩蕩遵即通行曉諭被災百姓無不歡

聲動地焚香叩頌

天恩臣惟有督率屬吏殫力撫綏以仰副我

皇上視民如傷盛心今據布政使王樸詳稱被災九分
十分田畝二十九年緩徵錢糧作何開徵呈請題明前
來臣查江省民間並無蠶桑之利仰事俯育惟播種
是賴乃蒙

皇上垂念災黎當青黃不接之時輸納維艱

特旨緩徵誠

聖心洞悉民隱無微不照也但江右從未奉有緩徵之行出自曠典其開徵限期無例可循應否將被災九分十分者寬至六月開徵使被災獨重之民於春末夏初之間得以盡力南畝而旱未已登則完納自易羣戴天恩於無既矣相應具題聽候部議臣謹會同江南江西督臣傅臘塔合詞具疏伏乞

皇上睿鑒勅部議覆施行

再請緩徵兵米疏

二十九年四月
二十九日上

該臣看得江省康熙二十九年本色兵米循請寬期緩徵一案前准部覆行令具題等因隨即檄行督糧道查詳去後今據護理督糧道印務南昌府知府張士佺詳稱通省各鎮標營兵丁應支康熙二十九年分月米已行各屬將舊存米內先行支給其有不敷者仍於省倉撥濟所有部撥額米五萬四千石當循例緩徵仍於九月全完俾民力稍寬於旦夕而舊米亦可免紅腐之虞等因呈詳前來臣覆查無異相應具題聽候部議臣

謹會同江南江西督臣傅臘塔合詞具題伏乞

皇上睿鑒勅部議覆施行

請給漕糧腳耗疏

二十九年五月
二十三日上

該臣看得江西省自康熙二十三年起至二十六年止
漕糧奏銷案內支給腳耗米石部駁各省無此扒夫等
項名色概令行追今據護理督糧道印務南昌府知
府張士佺詳稱行據各府會詳江省有濱州縣濱江者無
幾餘皆僻處山陬僅通溪河一線軍船不能徑抵縣兑

必需雇募夫船盤剥前項耗米在所必需久已按數給
發原領各夫無可查追如不蒙准銷將來運解支給無
項勢必悞漕累民等因前來臣查有漕各屬距省數
百里以至千里不等內止數縣濱江如遇水漲方可便兑
節省其餘盡通溪河又多砂石險灘冬月運漕之時正
當水涸隨處淺阻軍船重大不能徑赴受兑俱係各州
縣雇夫運送用過灘小艇載出溪河遇有淺阻用夫盤
剥始達省倉交兌軍船是以全書額編漕糧腳耗留為

各縣雇船募夫等用所謂因地制宜者此也至若各省
河道深闊軍船可以徑赴州縣受兌並不需此盤剝夫
船是以無此扒夫等項名色而為江省所獨有也在部
臣駁追蓋因節省起見臣身在地方稔悉河道形勢雇
募夫船盤運必不能免且已給之項為時已久船戶扒
夫盡已四散無可追取責成見任之官力不能賠將來
運漕支給無項勢必累民尤臣之所惴惴滋懼者也我
皇上軫念民瘼

恩蠲正供數盈千萬深仁厚澤亘古所無臣敢冒昧

上請仰祈

皇上勅部允銷度已給之項獲免查追而將來運解漕糧可以按款支給不致累民感戴

皇仁靡有紀極矣臣謹會同江南江西督臣傅臘塔總督漕臣董訥合詞具疏伏乞

皇上睿鑒勅部議覆施行

請免兵米折解疏

二十九年七月
二十七日上

該臣看得江省康熙二十九年上半年所徵兵米並厯年存剩米石照時折價解部一案行據督糧道叅議郝惟諤詳請仍留等因前來臣查兵米係計日授餐之需支給刻不容緩如俟四月完半各兵懸釜待炊里民正當播種之時農務方殷率多艱於辦納幸有厯年存剩兵米可以先儘支給將四月完半之米寬至秋成全完臣兩經疏請俱蒙

皇上俞允閩省兵民無不歡呼感戴

天恩今據該道詳稱本年上半年所徵兵米並歷年存
剩米共五萬八千六百九十餘石奉文盡行變價起解
倉無積貯倘遇歉歲採買給兵反致靡費且時值秋成
有田之家既不買米市廛貧民所需不過升斗如許倉
米斷難變價應仍照舊存倉每年動支上半年兵米
將四月完半之數寬至秋成全完年年出陳易新自無
紅腐之患適與部議相符則一轉移間於
國儲毫無所損而江省之民永荷緩徵之

聰恩矣臣謹會同江南江西督臣傅臘塔合詞具題伏乞

皇上睿鑒勅部議覆施行

再請給漕糧腳耗疏

二十九年十二月十三日上

該臣看得部駁行追自康熙二十三年起至二十六年止運漕耗米其難追情由臣前具疏會題請銷部議未允臣亦何敢再瀆

天聽惟是嚴檄飭追不遺餘力茲又據護理督糧道印務南昌府知府張士佺詳據有漕各府詳稱此項米石

給散年久並無扒腳等夫船戶姓名住址可以查追支
給各官又已陞遷事故不一承追之官徒受叅罰無從
追取且將來運漕無米支給不能雇募夫船勢必悞運
累民詳覆前來臣查各屬運漕至省皆由溪灘小河必
需夫船盤剥原與別省河道深闊者不同是以運漕立
法之始即設此項脚耗以資飛輓故各省皆無扒腳等
夫名色而為江省所獨有也在部臣從節省起見行令
追取蓋未悉江省河道形勢實與別省不同臣在地方

知之最詳安敢隱默不言以貽悞漕累民之患且所追之米實無可追在各官徒受叅罰終屬無濟不得不據詳再疏上請仰祈

皇上睿鑒特賜允銷江省官民得免運漕之累頂戴天恩真無紀極矣臣謹會同江南江西督臣傅臘塔總督漕臣董訥合詞具題伏乞

皇上睿鑒勅部議覆施行

條議解送旗員疏

三十一年三月十一日上

竊惟我

皇上聖明天縱德盛化神宇內蒼生無不含哺鼓腹歌
咏太平凡屬大小臣工尤僅

宸衷體恤深仁厚澤亘古所無在於見行定例有應仰
承

德意者敢不冒昧上請以祈採擇如在外八旗漢軍文
武官員有因參革降級緣事解任裁缺候補丁憂休致
者并其家口槩催歸旗既已嚴立限期復令取經過州

縣沿途交付印結倘有中途逗遛該地方文武各官均有處分嚴例地方各官凜遵

功令凡屬旗員起行槩查家口名數請給咨牌交與沿途文武各官照撥兵役遠程遞送每至接替處所必將家口按名查驗方取印結回轉臣竊謂遞送取結止應行於叅革有罪之員恐有沿途逗遛或致違限故也若夫丁憂降調裁缺候補等員俱有官職並無罪愆乃與叅革之員一槩沿途取結查驗家口兵役押送竟與有

罪者無異所當亟行變通者也臣請嗣後歸旗官員除
叅革有罪及侵那錢糧并有贓私解部比追及案結應
歸休致病故者並查家口照例給發咨牌逐程遞取
結交卸倘有沿途逗遛即查該地方文武職名一併按
例處分外其在丁憂降調裁缺候補等員服官有日無
不顧惜功名何敢故違嚴例自罹叅革似應免其沿途
取結可省兵役遞送止給到京定限咨文先將起行日
期報部如有違限即將本官處分歸旗之員既邀

寬恩又畏嚴例自不敢或有後期而在沿途地方文武各官亦省遞送取結之煩於以廣

皇仁而宏體恤靡有紀極矣如果臣言不謬伏乞

皇上睿鑒勅部議覆施行

南昌等府積欠請分年帶徵疏

三十年四月三十日上

該臣看得錢糧關係

國課自應年清年額不容拖欠絲毫惟是江右地方經甲寅變亂之後傷殘已極臣自莅任以來日事撫循如

火耗私派雜差等弊盡行革除念百姓止此膏血省得一分浮費即可完

朝廷一分正供無如閭閻彫敝元氣未能盡復田土硗薄又值水旱游臻以致歲額錢糧未能全完因而年壓一年積欠愈多如南昌府屬之豐城進賢二縣康熙二十六七兩年共未完地丁等銀八千八百七十七兩零吉安府屬之廬陵永豐泰和安福四縣康熙二十三年起至二十七年止共未完地丁等銀二萬三十九兩零

廣信府屬之上饒鉛山永豐弋陽四縣康熙二十三年
起至二十七年止共未完地丁等銀二萬八千八百五
十五兩零南康府屬之安義縣康熙二十六七兩年共
未完地丁銀四千五百一十四兩零贛州府屬之寧都
縣康熙二十六七兩年共未完地丁銀一千一百六十
五兩零以上一十二縣共未完民欠銀六萬三千四百
有奇臣日行嚴催不遺餘力今據布政司布政使盧崇
興詳稱據各屬士民紛紛具控咸以向經兵燹既受包

賠復苦並徵敲朴多年奄奄垂斃請豁請緩情甚可矜
并據各府縣道具節年民欠清冊請將康熙二十三年
起至二十七年止未完民欠錢糧以康熙三十年為始
每年帶徵一年以舒民力等因前來臣查江右土瘠民
貧耕穫而外別無資生之策又自寇亂之後田荒丁缺
包賠苦累以終歲胼胝之勞尚不足供本年之額賦而
以數年之積欠並徵於一時箠楚之下宛轉哀號誠
聖慈所矜憫者也臣叨膺

特簡職在撫綏仰體

皇上視民如傷之仁目擊民困敢不上聞伏祈

皇上俯念江右兵燹之後荒旱頻仍民困實甚新舊錢糧委難並徵將康熙三十三年起至二十七年止未完民欠錢糧請自康熙三十年為始每年帶徵一年庶民困得以少蘇而

國賦不致終懸矣臣非不知

國用殷繁錢糧豈容延緩但與其節年並徵民苦分應

而難完何如遞年分徵民得專力而易辦是帶徵之請似遲而實速似拙而反盈既於額賦無虧實於民生有裨起此溝壑之瘠永為輸將之氓則數百萬難後遺黎咸沐

皇上如天之仁奕世頂祝於不朽矣至於吉水一縣因知縣吳大本經臣糾叅尚未交代俟接署官查確民欠至日另疏具題合併聲明既據該司造冊呈詳前來相應具題除將清冊揭送戶部查考外臣謹會同江南江

西督臣傳臘塔合詞具題伏乞

皇上睿鑒勅部議覆施行

三請給漕糧腳耗疏

三十一年八月
二十日上

該臣看得漕糧腳耗前奉部駁自康熙二十三年起盡行追解臣經兩次具題部議未允遵即檄行嚴追去後今據布政使盧崇興督糧道叅政蘇昌臣呈詳前來臣查脚耗銀米自有漕以來即設此項刊載全書非同解款蓋因江省州縣距省近者二三百里遠者八九百里

溪灘河淺漕艘難行勢必雇覓小艇竹筏用夫挽拽運至省倉方可交兌原與他省漕船可以徑赴水次受兌者不同此項脚耗原為運米而設舊全書開載甚明厯來照例支給並非額外開銷近准部文新全書停其頒發仍照舊全書遵行則是脚耗一項應照舊全書支給無疑矣况當日雇夫雇船不過竭蹙完公一時濟用自不問其姓名亦不登記冊籍無論脚夫舟子萍蹤莫定數載以來存亡莫考即或見有其人乃係赤貧食力之

輩盡力終朝僅得升合若將已役之工價責令償還恐
敲朴徒施萬難完補再如經手州縣陞遷降革屢易其
人今責成於見任各官追無可追賠不能賠四十八州
縣之官徒受叅罰終無實濟伏念我

皇上軫恤兆民蠲租賜賑動以千百萬計浩蕩洪恩遍
洽宇內似此零星已給之脚耗赤貧無著之夫船若不
亟請矜豁官民累無底止臣謹據詳三疏上請仰懇
皇上軫念江漕必需脚耗將從前給過者

特賜允銷將來解運者照舊支給庶於漕務有濟永無
貽累不然數十萬石漕糈遠在溪灘之中何能飛入省
倉漕船之內脚耗一裁官無他術勢必重累小民臣身
任地方何敢緘默有負

皇上殷殷愛民之

聖懷也臣謹會同江南江西督臣傅臘塔總督漕臣董

訥合詞具題伏乞

皇上睿鑒勅部議覆施行

保薦營官疏

三十年十二月
二十六日上

康熙三十年十二月二十四日准兵部咨開康熙三十
年十二月十二日奉

上諭諭兵部武職官員任寄封疆關係甚重必得其人
始有裨益朕所簡閱素悉之員俱已次第拔擢今宜選
材以備任用爾部行文各將軍總督巡撫提督及無提
督省分總兵官於武職官員內副將以下千把總以上
有灼見人材勇健諳練軍務整飭營伍愛恤士卒及行

間効力曾經立功者不論本省別省見任候補限文到
三日内各舉所知保奏不必彼此會同其在內八旗漢
軍官員有人材素優嫻於約束堪任要地者亦著各都
統副都統保奏兩部即遵諭行特諭欽此移咨到臣欽
惟我

皇上文德覃敷武功赫濯薄海内外無不嚙嚙向化共
樂昇平而

聖心廣運加意武備特頒

諭旨令將軍督撫提鎮諸臣各舉所知以備任用臣仰體

皇上旁求至意謹將親知灼見之并據實入

告如江西原任寧都營叅將王國忠福建泉州府同安縣人人材勇健長於藤牌片刀訓練士卒和睦兵民前因盜案降調兵民合詞籲留經督臣與臣會題奉

旨留任後於欽奉

上諭事案內復級今陞四川遵義副將再如南瑞鎮標

前營遊擊趙永吉山東兗州府金鄉縣人人材勇健久
歷戎行先以丁憂離任於康熙二十七年六月內有叛
犯李美玉袁大相乘湖廣叛兵之變謀為不軌臣知該
將智勇堪任密委擒拏隨縛二犯解臣審明正法餘黨
盡散省會獲寧業經題報在案旋即題補今職再如
浮梁營守備張明斗直隸真定府深州人人材勇健整
飭營伍曾經効力行間以上三員均堪任用所當遵
諭保題此外尚有原任廣信營叅將王志係福建泉州

府同安縣人曾經効力行間屢著戰功長於藤牌片刀
諳練軍務兵民愛戴陞任貴州銅仁副將今因原任內
有叛犯吳讓等逃入該將汛內一案雖已擒獲詐誤革
職亦臣親知灼見之并合并聲明應否

簡用統候

聖裁臣謹具題伏乞

皇上睿鑒勅部議覆施行

四請給漕糧脚耗疏三十一年四月初七日上

該臣看得江省漕糧腳耗自康熙二十三年起歷年奉
部駁追臣節經具題請銷部議以全書內雖有支給耗
費銀米字樣並無脚銀腳米字樣仍令追完報部遵即
檄行嚴追去後今據布政使盧崇興督糧道叅政蘇昌
臣復據各府縣額詳前來臣查江省有漕州縣率皆僻
處山陬距省窩遠灘高水淺沙石參錯軍船不能抵縣
受兌必須雇募小艇竹筏盤運至省方得交兌此江省
兌漕情形與別省不同所以全書編有耗費銀米之款

以為雇募船隻扒腳等夫之用自我

朝定鼎以來各屬遵照全書每年隨漕徵給其難追情由臣已三疏入告不敢復贅今部覆以全書內雖有支

給耗費銀米字樣並無支給腳銀腳米字樣是內部亦

以全書所編之耗費應行動給而此項請銷之腳銀腳

米恐係重支故復駁追臣查耗費銀米者全書該載之

總名腳銀腳米者各縣支銷之細數總屬一條並非兩項況各縣分編漕糧項下編有腳耗米數附載項下編

有運費船腳銀數則是全書內原有脚銀脚米字樣其
非重支也明矣且當日所雇夫船悉屬遠方窮民計日
受餐事畢星散原未質其姓名以為今日查追之地如
康熙二十三年至二十六年承追之官數百餘員俱經
部議降俸矣二十七年支給之官三十餘員又經部議
降調矣是凡有漕州縣無不處分之員其萬難追取業
可概見更慮將來運漕無資既不准動額編之項又無
神輸鬼運之方勢必責成糧里自運赴省以致苦累小

民此各州縣所以紛紛竊詳也伏見我

皇上深仁厚澤蠲賦賑荒動以千百萬計即如從不蠲

免之漕糧尚蒙

特諭蠲免洪恩浩蕩遍洽寰區而江省此項遵照額編
久經給散之耗費若不亟請矜豁則將來累民勢所難
免臣謹據詳再疏上請仰懇

皇恩軫念江漕必需耗費勅部查察全書將從前給過

者

特賜允銷嗣後解運者照舊支給庶民生永無貽累而
國儲亦得早登感沐

皇恩靡有紀極矣臣謹會同江南江西督臣傳臘塔總
督漕臣董訥合詞具題伏乞

皇上睿鑒勅部議覆施行



西陂類稿卷三十三